

- प्रधानमंत्री नरेन्द्र मोदी गुजरात रा गांधीनगर मांय “डिजिटल भारत सप्ताह” री सरुआत कीनी- केई डिजिटल सुबीतां री सरुआत कीनी।
- प्रधानमंत्री कह्यो- आजादी पाछै पैली दफा देश मांय जनजातीय गौरव अर विरासत रो दरसाव करण सारु आदिवासी संग्रहालयां री स्थापना।
- दूरसंचार विभाग वायरलेस जैमर अर बूस्टर/रिपीटर्स काम लेवण ऊं जुड़्या नुवा परामर्श जारी कीना।
- अलवर जिला रा भिवाड़ी मांय एक गैर सरकारी बैंक ऊं 70 लाख रुप्या री नकदी अर 26 लाख रुप्या रा जेवरात लूटी ज्या।
- राज्य सरकार 29 आई.ए.एस. अर 16 आई.पी.एस. अहलकारां रा तबादला कीना।

000

प्रधानमंत्री नरेन्द्र मोदी आज गुजरात रा गांधीनगर मांय डिजिटल भारत सप्ताह री सरुआत कीनी। ई मौके वे कह्यो के भारत डिजिटल इंडिया अभियान ने दुनिया सामी रख्यो।

प्रधानमंत्री केई डिजिटल सुबीतां री सरुआत ई कीनी। डिजिटल भारत सप्ताह रो मकसद लोगां ने प्रौद्योगिकी सुलभ करा र जिंदगी ने आसान बणावण अर अर स्टार्टअप तंत्र ने मजबूत करणो है।

000

प्रधानमंत्री नरेन्द्र मोदी स्वतंत्रता सेनानी अल्लूरी सीताराम राजू री सवा सौ वीं जयंती रे मौके आज आंध्रप्रदेश रा पश्चिमी गोदावरी जिला रा भीमावरम मांय वां री कांसा री मूरत रो अनावरण कीनो। ई मौके प्रधानमंत्री कह्यो कै देश आजादी रा 75 साल रा अमृत महोत्सव रो जश्न मना रह्यो है अर ई सागै ई अल्लूरी सीताराम राजू री सवा सौ वीं जयंती ई मना रह्यो है। प्रधानमंत्री कह्यो कै देश री आजादी सारु करीजी “रम्या क्रांति” रा ई एक सौ साल पूरा व्हे ग्या है। प्रधानमंत्री सीताराम राजू ने श्रद्धांजलि देता थकां कह्यो कै अल्लूरी सीताराम राजू री हिम्मत ऊं हर भारतीय ने प्रेरणा मिले है। प्रधानमंत्री कह्यो कै नुवा भारत देश री आजादी सारु जान कुर्बान कर देवण वाळां सैनानियां रा सपनां रो भारत व्हेवणो चाहिजे। वे कह्यो कै लारला आठ साल मांय सरकार जनजातियां रा कल्याण सारु अल्लूरी सीताराम राजू रा सिद्धांतां माथै चालता थकां निष्ठा सागै काम कीनो है। प्रधानमंत्री कह्यो कै देश री आजादी पाछै पैली दफा जनजातियां रा गौरव अर विरासत रो दरसाव करण सारु आदिवासी संग्रहालय खोल्या जा रह्या है।

000

केंद्रीय गृह अर सहकारिता मंत्री अमित शाह कह्यो है कै भारत मांय सहकारी समितियां लारला एक सौ साल मांय चोखो काम कीनो है। आज नुवी दिल्ली मांय सहकारिता रा 100वां अंतर्राष्ट्रीय दिवस रे मौके सहकारिता मंत्रालय अर राष्ट्रीय सहकारी संघ री ओर ऊं राख्यी ज्या कार्यक्रम मांय बोल रह्या हा। शाह सगळी सहकारी समितियां ऊं आवता एक सौ साल मांय और बेहतर काम करणो तैय करण बाबत् कह्यो।

ई साल अंतर्राष्ट्रीय सहकारिता दिवस रो मुद्दो है-सहकारिता की आत्मनिर्भर भारत और बेहतर विश्व के निर्माण में भूमिका।

000

दूरसंचार विभाग आम जनता सारु वायरलेस जैमर अर बूस्टर/रिपीटर्स रा इस्तेमाल ऊं जुड़्या नुवा परामर्श जारी कीना है। एक जुलाई ने जारी करी ज्या दिशा-निर्देशां रे मुजब आमतौर ऊं सेलुलर सिग्नल जैमर, जीपीएस ब्लॉकर या दूजा सिग्नल जैमिंग उपकरणां रो इस्तेमाल अवैध है। आं उपकरणां रो इस्तेमाल करण री मंजूरी वां लोगां अर संस्थावां ने है, जो सरकार ऊं पैली ई मंजूरी लीनी है। भारत मांय सिग्नल जैमिंग उपकरणां रो विज्ञापन, बिक्री, वितरण, आयात या कारोबार करणो गैरकानूनी है।

000

राज्य मांय 29 आई.ए.एस. अहलकारां रा तबादला कर दिया ज्या है। कैलाश चंद मीणा ने गृह विभाग रा सचिव ओहदा ऊं तबादलो कर र जोधपुर रा संभागीय आयुक्त बणायी ज्या है। प्रकाश राजपुरोहित ने जयपुर रा जिला कलेक्टर बणायी ज्या है। जितेन्द्र सोनी ने अलवर, अनिल कुमार अग्रवाल ने धौलपुर, डॉ. इंद्रजीत यादव ने डूंगरपुर, टीना डाबी ने जैसलमेर अर डॉ. रवीन्द्र गोस्वामी ने बूंदी रा जिला कलेक्टर बणायी ज्या है। राज्य मांय 16 आई.पी.एस. अहलकारां रा ई तबादला करी ज्या है। प्रसन्न कुमार खमेसरा ने कोटा रेंज अर गौरव श्रीवास्तव ने भरतपुर रेंज रा आई.जी. बणायी ज्या है। कुछ जिलां रा एस.पी. ई बदल दिया ज्या है।

000

अलवर जिला रा भिवाडी मांय आज बदमाश एक गैर-सरकारी बैंक री शाखा ऊं 70 लाख रुपया ऊं बत्ती रकम अर कोई 26 लाख रुपया मोल रा गेहणा लूट लीना। बैंक रा कर्मचारी पुलिस ने बताया के 10 बजां रे करीब बैंक खुलण री थोड़ी देर पछै ई आया डाकू कर्मचारियां ने बंधक बणा र लॉकर री चाबी ले लीनी अर लॉकर मांय रख्योड़ी रकम अर सोनो लूट र फ़रार व्हे गया। वारदात पाछै जयपुर रेंज रा आईजी उमेश दत्ता समेत मौके पूग्या पुलिस रा आला अहलकार जांच सरू कर दीनी। भिवाडी रा एडिशनल एस.पी. विपिन शर्मा आकाशवाणी ने बताया के हलका मांय नाकाबंदी कर दीरीजी है। मामला री जांच सारू लुटेरां री तलाश मांय पुलिस री छह टीमां लगायी ज्यी है।

000

भ्रष्टाचार निरोधक ब्यूरो ई साल रा छह महीना मांय भ्रष्ट सरकारी कर्मचारियां अर अहलकारां रे खिलाफ पीसी एक्ट रा तैत हाल ताई 267 मामला दर्ज करी ज्या है। आं मांय 252 मामला ट्रैप रा, 9 आमदनी ऊं बत्ता माल-असबाब रा अर छह मामला ओहदा रा बेजा इस्तेमाल रा मामला भेळा है। साल 2020 मांय ई अवधि मांय 104 मामला, जदके लारला साल 236 मामला दर्ज करी ज्या हा।

000

प्रदेश रा कोटा संभाग मांय काल व्ही जोरदार बिरखा ऊं चंबल, कालीसिंध अर पार्वती नदियां मांय पाणी रो लेवल ऊंचो आ ग्यो है। संभाग रा चार ई मोटा बंधा बूता ताई भरबा आया है। हाल ताई गांधी सागर बंधा मांय 1 हजार 298 फीट, राणा प्रताप सागर मांय 1 हजार 138 फीट, जवाहर सागर मांय 978 फीट अर कोटा बैराज मांय 853 फीट पाणी भर ग्यो है। हलका मांय बिरखा रे कारण कैथूदा रपट माथे पाणी आ जावण ऊं बारां-मथुरा-सवाईमाधोपुर गेलो बंद व्हे ग्यो है, ज्यीं कारण मुसाफिरां ने गेंता माखीदा पुल ऊं व्हे र आवणो-जावणो पड़ रह्यो है। सवाईमाधोपुर जावण वाळा मुसाफिर श्योपुर गेला ऊं निकळ रह्या है। बूंदी मांय व्ही बिरखा पाछै मोकळा सैलाणी जिला रा ठावा रामेश्वर महादेव पूगण लाग्या है। धौलपुर मांय आज दोपहरां री बगत बिरखा व्ही। बाड़मेर मांय ई दोपहरां री बगत एक घंटा ताई मेह व्ह्यो। ई बीचे मौसम विभाग काल अजमेर, भीलवाड़ा, बूंदी, टोंक, डूंगरपुर, कोटा, सवाईमाधोपुर अर उदयपुर, जिलां मांय कठे-कठे भारी अर एक-दो ठोडां घणी भारी बिरखा सारू चेतायो है। नागौर अर पाली जिला मांय कठे-कठे जोरदार मेह व्हेवण रा आसार है, जदके हनुमानगढ़, जालौर, जोधपुर, बाड़मेर, श्रीगंगानगर, अलवर, बांसवाड़ा, बारां, भरतपुर, चित्तौड़गढ़, दौसा, जयपुर, झालावाड़, झुझुनूं, करौली, प्रतापगढ़ अर राजसमंद जिलां मांय बादळा गाजण अर कठे-कठे बीजळी पड़बा रा आसार है। मौसम विभाग रा जयपुर केन्द्र रा निदेशक राधेश्याम शर्मा बताया के राज्य मांय काल ऊं सात जुलाई ताई बारिश रो नुवो दौर सरू व्हेवण री संभावना है।

000

जयपुर शहर रा जगतपुरा, महल रोड रा आरे-सारे रा हलका, प्रतापनगर अर खो-नागौरियान हलका मांय बेगी ई बीसलपुर बंधा ऊं पाणी री पूर्ति करी जावेला। मुख्यमंत्री अशोक गहलोत बीसलपुर परियोजना रा दूजा दौर रा कामां सारू 366 करोड 67 लाख रुपया मंजूर कीना है। इण ऊं बगरु विधानसभा हलका रा तैत आवण वाळा जयपुर नगर निगम ग्रेटर रा वार्ड नम्बर 199 अर पांच गांवां रा कोई 20 वर्ग किलोमीटर हलका मांय जनता ने फायदो मिलेला। ध्यानजोग है कै मुख्यमंत्री अशोक गहलोत बजट मांय बीसलपुर बांध पेयजल परियोजना रा दूजा दौर रो ऐलाण कीनो हो।

000

राजसमन्द जिला रा भीम कस्बा मांय आज बदनोर चौराहा माथे ड्यूटी कर रह्या पुलिस रा एक हेडकांस्टेबल माथे अणजाण लोग हमलो कर दीनो। हमला मांय घणा जख्मी व्ह्या हेडकांस्टेबल ने ब्यावर रेफर करी ज्यो जठै ऊं वां ने अजमेर रैफर कर दियो ज्यो। हमला री ई वारदात पाछै भीम कस्बा मांय ओजू तणाव व्हे ग्यो। राजसमंद रा एस.पी. सुधीर चौधरी बताया के भीम कस्बा मांय पुलिस कर्मचारियां री तादाद बधा दीरीजी है अर हमलो करण वाळा ने बेगो ई पकड़ लियो जावेला। दूजी कानी राजसमंद री सांसद दीयाकुमारी केई विधायकां सागे एस.डी.एम. ने पानड़ी सूप र निर्दोष लोगां माथे कार्यवाही नी करण री मांग कीनी। सांसद दीयाकुमारी जनता ऊं उग्र प्रदर्शन नी करण री अपील कीनी।

000

उदयपुर मांय लारला दिनां असामाजिक तत्वां कानी ऊं करी ज्या हमला मांय मारी ज्या एक जणा कन्हैया लाल रा पिरवार वाळां सागे आज जल शक्ति मंत्री गजेंद्र सिंह शेखावत मुलाकात कर र वां ने सांत्वना दीनी। ई पाछै वे खबरनवीसां सागे बातचीत कीनी।

000

निर्वाचन विभाग वोटरलिस्टां मांय नाम मंडावण सारू भर्या जावण वाळा फॉर्म मांय बदलाव कीनो है। नुवा फॉर्म एक अगस्त ऊं काम लिया जा सकेला।

000